



*Jumat, 01 November 2024*  
*Ogen. Maleaki 1:1-5*



**"Keleng Ateku Kam"**



Sada bagi syair lagu bas KEE 177 *"Kekelengen ni Dibata, kekelengen Badia, nusur kap ku doni enda nemani manusia, ras seterusnya..."*. Biak Tuhan si sembah kita e me perkeleng. Tanda keleng ateNa nandangi kegeluhenta e me alu la erahan-ahan tetap iberekenNa. AnakNa si tonggal pe ibereken guna engkelengi kegeluhenta. Keleng ateNa e erbahansa malem ateta. Maleaki 1:1-5 nuratkan kerna keleng ate Tuhan man bangsaNa. "Keleng kal ateKu kam." Kalimat enda ibelasken Tuhan man bangsana, janah la terjeng ibelasken Tuhan, tapi pe tuhu-tuhu kal icidahkenNa kerna keleng ateNa nandangi bangsaNa e. Tupung isungkun bangsa e, kerna kai kin bukti keleng ate Tuhan nandangi kegeluhenna; *"Esau ras Jakup tuhu-tuhu ersenina, tapi Jakup ras kesusuren nge si Kukelengi, janah Esau ras kesusurenna segat ateKu. Tanehna si erdeleng-deleng enggo Kuradasken dingen enggo itadingken jadi sikerajangen rubia-rubia si meliar"*, bage nina Tuhan man bangsaNa. Keleng ate Tuhan kempak bangsaNa tetap ituduhkanNa; Keleng ate Tuhan kempak bangsaNa tetap ilakokenNa; keleng ate Tuhan kempak bangsaNa tetap icururkenNa. Keleng ateNa e tiap wari mbaru; bagi matawari pultak teptep erpagi-pagi. BiakNa si perkeleng e jadi biakta ka min selaku kita anak-anakNa. BiakNa si perkuah e jadi biakta ka min selaku kita bangsaNa; sidadhken keleng ateta nandangi sekelewetta bage pe nandangi tinepa Dibata sideban. "Keleng kal ateKu kam" e me sada bentuk pengakun Tuhan nandangi bangsaNa. Pengakun Tuhan e jadi sada pergegeh man banta i bas kita nggeluhken kegluhenta. Pengakun Tuhan kerna keleng ateNa erbahansa kita tetap dingen megegeh aminna gia melala persoalen si man hadapenta. Tetaplah si inget maka keleng ate Tuhan e, la pernah nadingken kita; tetaplah sigejapken maka kita banci ngelewati kerina persoalen erkiteken keleng ateNa si mbelin nandangi geluhta. ingetlah maka nina Tuhan kempak dirinta: keleng kel ateKu kam; janah keleng ateKu e la pernah nadingken kam.

☞ *Gejapkenlah keleng ate Tuhan kempak geluhta*